

NÜXÏRAÜXÜ GA POPERA GA PEDRU ÜMATÜXÜ

Pedru nüxü narümoxë ga yema yaxögüxü ga to ga nachiuãnegu woonexü

¹ Pa Chaueneëgüx, choma i Pedru nixi i pexcèx chanaxümatüxü i ñaã popera. Rü choma nixi i Ngechuchu ya Cristu choxü muxü na duüxügümaã nüxü chixuxücèx i norü ore. Rü pexcèx chanaxümatü i pema na perü naãnena to i nachiuãnegügu penawoonexü i Pötuanewa rü Gárataanewa rü Capadocháanewa rü Áchiaanewa rü Bitíniãanewa ngëxmagüxe.

² Rü pexü nixi ga nadexü ga Tanatü ya Tupana, yerü woetama yema nixi ga nuxcümaxüchima naga naxinüxü. Rü nanamu ga Naã i Ünexü na pexü yamexëëgüxücèx na aixcüma napëxewa pixüünegüxücèx rü Ngechuchu ya Cristuga na pexinüëxücèx rü nagümaã na piyaxgüxücèx na nataxuxücèx i perü chixexügü. Rü chanaxwèxe i Tanatü ya Tupana poraãcü pexü narüngüxëë rü pexü nataãëxëë.

Ítananguxëë na wena tá imaxëxü

³ ¡Rü ngixã nüxü ticuèxüügü ya Tupana ya tórü Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tüxna nanaxã ga maxü ga yexwacaxüxü, yerü poraãcü nüxü

tangechaütümüügü. Rū ngēmacèx i ñuxma i yixema rü ta ítananguxēẽ na wena tá imaxēxũ.

⁴ Rū pema rü wüxi i ngunexũgu rü aixcüma tá penayauxgü i guxũma i ngēma mexũgü i Tupana tá pexna āxũ i ñuxma daxũguxũ i naānegu pexũ namaã nanguxũxũ. Rū ngēma tá pexna naxāxũ rü tagutáma inayarũxo, rü tagutáma naxāũāchi, rü tagutáma nangau.

⁵ Rū ñuxma na Tupanaāxũ peyaxōgũxũ rü nüma rü norü poramaã tá pexna nadau ñuxmatáta aixcüma penayauxgü i ngēma maxũ i taguma gúxũ i tá pexna naxāxũ i ngēxguma naguxgu i naāne.

⁶ Rū ngēmacèx name nixĩ i poraācü petaāēgü, rü nüetama nixĩ ega woo ñuxma ñāã perü maxũwa rü paxaxāchi muxũma i guxchaxũgü pexũ üpetügu.

⁷ Erü ngēmaācü nixĩ i pexũ naxũxũ ya Tupana na nüxũ nacuáxücèx rü ngoxi aixcüma peyaxōgü rü ěxna tama. Rū ngēxguma peyaxōgüamagu ega woo guxchaxũgü pexcèx ínguxgu, rü ngēma perü õ rü wüxi i uiruarü yexera nixĩ na namexũ erü ngēma uiru rü woo namexēchi natürü düxwa nangau. Rū ngēma uiru rü üxũmaã nüxũ taxü na nüxũ icuáxücèx rü ngoxi aixcüma uiruxüchi yĩxũ. Rū ngēxgumarũ ta nixĩ i perü õ na guxchaxũgümaã Tupana nüxũ üxũ na nüxũ nacuáxücèx rü ngoxi aixcüma nüxũ peyaxōgü na yixcama pexũ yacuèxüüxücèx rü mexũ i pechica pexna naxāxücèx rü pemaã nataāēxücèx i ngēxguma wena núma naxũxgu ya Ngechuchu ya Cristu.

⁸⁻⁹ Pema rü Ngechuchu ya Cristuxũ pengechaũgü woo taguma nüxũ na pedaugũxũ.

Rü ñuxma rü ta woo tama nüxũ pedaugü, natürü nüxũ peyaxõgü, rü poraãcü petaãëgü. Rü ngëma perü taãëmaã rü taxuacüma nüxũ pixuëga na ñuxãcü petaãëgüxüchixũ, erü marü penayauxgü i perü maxũ i taguma gúxũ. Rü ngëmacèx nixĩ i nüxũ peyaxõgüxũ.

10 Rü nuxcümaxũchima ga Tupanaãrü orearü uruügü, rü nüxũ nixugüe ga na ñuxãcü tá Tupana pexũ narüngüxëëxũ. Rü nümagü rü poraãcü nangüe rü naxcèx nadaugü i ngëma maxũ i taguma gúxũ.

11 Rü nümagü ga yema orearü uruügü rü Tupanaãrü poperawa nangüe na nüxũ nacüëxgüxüçèx na ñuxãcü tá na yïixũ rü ñuxguacü tá na nangóxũ ga guma Maxëxëëruũ ga Cristu. Rü Cristuãe i Üünexũ ga yema orearü uruügüwa yexmaxũ, rü nüxũ nüxũ nacüëxëë ga na Cristu rü tá ngúxũ yangexũ rü tá nayuxũ rü yixcama rü wena tá na namaxũxũ rü ñuxũchi daxügüxũ i naãnewa tá na naxũxũ na guxũãrü ãëxgacü yïixüçèx.

12 Natürü Tupana rü yema nuxcümaũgüxũ ga orearü uruügüxũ nüxũ nacüëxëë na tãütãma nümagü nüxũ nadaugüxũ ga guma Maxëxëëruũ ga naxcèx nadaugücü, natürü pema tá yïixũ na nüxũ pedaugüxũ. Rü dücax, Pa Chaueneëgüx, gumatama Maxëxëëruũchiga nixĩ ga perü orearü uruügü pemaã nüxũ ixugügüxũ ga yexguma Tupanaãe i Üünexũ ga daxüwa ne muxũ yadexagüxëëgu. Rü guxüma i ngëma ore i yima Maxëxëëruũchiga, rü woo Tupanaãrü orearü ngeruügü i daxüçüãx rü nüxũ nangüchaũgü na

yexeraãcü nüxũ nacuèxgüxũ.

*Tupana rü taxcèx naca na napêxewa
naxüünexüçèx i tórü maxũ*

¹³ Rũ ñuxma na Cristuarü duũxügü pixĩgüxũ, rü penaxwèxe na pexuãègüxũ rü ípememarexũ na penaxüxũ i norü ngúchaũ. Rũ name nixĩ i aixcüma meã ípenanguxẽẽ i guxũma i ngẽma mexügü i Tupana tá pexna ãxũ i ngẽxguma Ngechuchu ya Cristu núma üxgu.

¹⁴ Rũ ñuxma na Tupanaxãcügü pixĩgüxũ, rü penaxwèxe na aixcüma naga pexĩnüèxũ. Rũ tama name i nagu pexĩ ga yema nuxcümaũxũ ga perü ngúchaũ ga ũpa nagu pexĩxũ ga yexguma tauta Tupanaxũ pecuèxgu.

¹⁵ Natürü penaxwèxe i aixcüma meã pemaxẽ na Tupanapêxewa naxüünexüçèx i perü maxũ. Erü nũma ya Tupana ya pexũ decü, rü naxüüne.

¹⁶ Rũ norü ore i ümatüxũwa rü ñanagürü:
“Chanaxwèxe i chauxrüũ pixüüne, erü choma rü
chaxüüne”,
ñanagürü.

¹⁷ Rũ pema na “Pa Tonatüx” ñapegüxũ nüxũ ya Tupana, rü ñuxma na ñoma i naãnewa pemaxẽxũ rü name nixĩ i guxüguma nüxũ pemuẽ. Erü nũma rü aixcümaxũchi nanangugü i wüxichigü i duũxügüarü maxũ na ñuxãcü yĩxũ. Rũ tüxũ napoxcu ya guxãma ya texé ya chixexũ ügüxe, rü nüetama nixĩ ega woo texé tixĩgu, erü napêxewa rü nawüxigumare i guxũma i duũxügü.

¹⁸⁻¹⁹ Rũ Tupana rü marü pexũ ínanguxüxẽẽ nawa ga yema nuxcümaũxũ ga perü maxũ ga taxuwama mexũ ga perü oxigüxũtawa peyaxuxũ. Rũ

yema na nawa pexũ ínanguxũxẽẽxũcèx rü pexna naxããxũcèx i maxũ i ngexwacaxũxũ, rü poraãcü nüxũ naxãtanü. Yerü tama uiru rü êxna dïeru i ngauxwèxexũmaã nanaxütanü, natürü Cristugü ya mexêchicümaã nixĩ ga naxütanüãxũ. Yerü nüma ga Cristu rü ñoma wüxi i carneru i taxuwama nañuxraũxũ i Tupanacèx imáxürü pexcèx nayu na pexũ naxütanüxũcèx.

²⁰ Rü nüma ga Tupana rü woetama nuxcümamaxũchima tauta naãne ixügügu, rü marü Cristuxũ naxuneta na pexcèx nayuxũcèx. Natürü ñomaücüü nixĩ ga nangóxũ ga guma Cristu na pexũ nangũxẽẽxũcèx.

²¹ Rü ñuxma rü Cristugagu nixĩ i nüxũ peyaxõgüxũ ya Tupana ga yuwa Cristuxũ írüdaxẽẽcü rü daxüwa nagacü. Rü ngêmacèx nixĩ i ñuxma i Tupanaãxũ peyaxõgüxũ rü ípenanguxẽẽgüxũ na daxüwa pexũ nagagüxũcèx.

²² Rü ñuxma na naga pexĩnüẽxũ i Tupanaãrü ore i aixcüma ixĩxũ rü pexũ natauxcha na pegü pengechaũgüxũ erü Tupana rü marü pexũ in-ayanaxoxẽẽ i perü chixexũgü. Rü ngêmacèx penaxwèxe i aixcüma guxũ i perü ngúchaũmaã pegü pengechaũgü.

²³ Rü ñuxma i pema rü marü penayauxgü i ngexwacaxũxũ i perü maxũ. Rü ngêmacèx ñoma ngexwacèx pebuxürü pixĩgü. Natürü ngêma maxũ rü tama penatü rü pee ya yuwèxéxewa nixĩ i penayaxuxũ. Natürü Tupanaãrü ore i maxũxũ i taguma iyarüxoxũwa nixĩ i penayaxuxũ.

²⁴ Erü Tupanaãrü ore i ümatüxüwa rü ñanagürü:
 “Guxũma i duũxũgü rü ñoma wüxi i
 natüanerüümare nixĩ. Rü guxũma i norü

mexũ, rü wüxi i nanetüchacurüümare nixĩ. Rũ ngẽma natüane rü nayu, rü nachacu rü narüngu. Rũ ngẽxgumarüü ta nixĩ i duũxügü na tama nataixũ i norü maxũ i ñoma i naãnewa.

²⁵ Natürü tórü Coriarü ore rü taguma inayarüxo”, ñanagürü i Tupanaärü orewa. Rũ ngẽma Tupanaärü ore i mexũ nixĩ ga pemaã nüxũ yaxugüxũ.

2

¹ Rũ ngẽmacèx name nixĩ i nüxũ perüxoe i guxüma i chixexügü, rü ngẽma na pidoratèèxgüxũ, rü ngẽma na togüpèxewa meã na pemaxènetaxũ rü ngẽma na pixãüxãchiwèxegüxũ, rü ngẽma na pexoregütèèxgüxũ.

²⁻³ Rũ ngẽxguma chi aixcüma nüxũ picuèxãchitanügu na ñuxãcü namecümaxũchixũ ya tórü Cori, rü ñoma wüxi i õxchana i ngexwacèx buxũ i naègünenixũ nüxũ ngúchaüxürüü penaxwexe i poraãcü pexũ nangúchaũ i norü ore na ngẽmawa peporaexücèx rü meã peyaexücèx i perü õwa na ngẽmaãcü guxüwama namexücèx i perü maxũ i taguma gúxũ.

Cristu nixĩ ya nuta ya maxücü

⁴ Rũ ñuxma rü name nixĩ i tórü Corina pengaicamagü. Erü nüma ya tórü Cori nixĩ ya yima nuta ya maxücü ya Tupana nayaxücü na namaã inaxügüãxücèx ya napata. Rũ woo duũxügü nüxũ oexũ, natürü yima nixĩ ya Tupana nayaxücü erü naxcèx rü namexèchi.

⁵ Rũ ngẽxgumarüü ta i pemax, rü Tupana pexũ nade na napataarü nutagü ya maxècü

pixĩgũxũcèx. Rũ pema nixĩ i Tupanaãrũ ngũxẽẽruũgũ i üünexũ i Ngechuchu ya Cristuégagu Tupanana ãmare pexãgũxũ. Rũ ngẽma ãmare i nüxna pexãgũxũ i namaã nataãẽxũ rũ ngema nixĩ i perũ maxũ i mexũ i napẽxewa.

⁶ Rũ Tupana rũ norũ ore i ümatũxũwa rũ Cristuchigaxũ nixu rũ ñanagürũ:

“Ñuxma na ichanaxũgũxũ ya chopata, rũ yima nuta ya nüxĩra chayaxücuchicũ, rũ yima nixĩ ya nuta ya mexẽchicũ ya chomatama chanayaxucũ na chopata namaã ichaxũgũxũcèx. Rũ yima nuta rũ chaunechiga nixĩ. Rũ yixema nüxũ yaxõxẽ, rũ aixcũma tá tanayaxu i ngẽma maxũ i taguma gũxũ i tümamaã ichaxunetaxũ”, ñanagürũ.

⁷ Rũ pema na nüxũ peyaxõgũxũ, rũ Cristu rũ pexcèx rũ guxũwama name rũ naporaxüchi. Natürũ ngẽma tama yaxõgũxũcèx, rũ taxuwama name. Rũ ngẽmacèx ya Tupana rũ norũ ore i ümatũxũwa rũ ñanagürũ:

“Yima nuta ya İpataarũ üruũgũ nüxũ ocũ, rũ chauxcèx rũ gucũ ya nutaarũ yexera namexẽchi. Rũ ngẽmacèx yimaetũwa nixĩ ichanaxũgũxũ ya chopata”, ñanagürũ.

⁸ Rũ Tupanaãrũ ore rũ ñanagürũ ta:

“Guxũma i ngẽma tama yaxõgũxũ rũ tama irũxĩnũẽchaũxũ rũ yima nutagu tá nayarũpucutũgũ”, ñanagürũ. Rũ ngẽmaãcũ i guxũma i ngẽma tama yaxõgũxũ rũ tá chixexũgu nayi erũ tama

Tupanaga naxĩnũechaũ rü tama Cristuaxũ nayaxõgũchaũ. Rü ngẽmacèx Tupana tá nanapoxcue yema nüma nüxũ yaxuxürüũ.

⁹ Natürü pema nixĩ i duũxũgü i tórü ãẽxgacü ya Tupana pexũ dexũ na norü ngũxẽeruũgü pixĩgũxücèx. Rü pema nixĩ i duũxũgü i napẽxewa ixüünexũ erü nümatama ya Tupana rü norü duũxũgũxũ pexũ nixĩgũxẽe na nüxũ pixuxücèx i norü ore i aixcüma mexẽchixũ. Rü nümatama ya Tupana nixĩ ga chixexüwa pexũ ínanguxũxẽexũ na norü ngóonexũ i mexẽchixũgu pechocuxücèx.

¹⁰ Rü ũpa ga pema rü tama Tupanaãrũ duũxũgü pixĩgü, natürü i ñuxma rü aixcüma norü duũxũgü pixĩgü. Rü ũpa rü taxúeaxũma pengechaũtümüũgü, natürü i ñuxma rü Tupanaãxũ pengechaũtümüũgü.

Ñuxma na Tupanaãrũ duũxũgü pixĩgũxũ, rü name nixĩ i meã naxcèx pemaxẽ

¹¹ Pa Chaueneẽgü ya Pexũ Changechaũgũxex, rü ñuxma na Tupanaãrũ duũxũgü pixĩgũxũ, rü tama ñoma i naãnecũãx pixĩgü. Rü ngẽmacèx pexũ chacèxũ na nüxũ perüxoexücèx i guxũma i ngẽma ngúchaũgü i chixexũ i ñoma i naãnecũãx nagu íxũ. Erü ngẽma ngúchaũgü i chixexũ rü taãexũ chixexũgu nanguxẽẽchaũ.

¹² Rü name nixĩ i meã pemaxẽ napẽxewa i ngẽma duũxũgü i tama Tupanaxũ cuèxgũxũ. Rü ngẽxguma woo poraãcü chixri pechiga yadexagügu i nümagü, rü tá nüxũ nadaugü na ñuxãcü mexũ pexũgũxũ, rü tá Tupanaxũ nicuèxüũgü i ngẽxguma Cristu wena núma ũxgu.

13 Rũ name nixĩ na tórũ Cori ya Ngechuchugagu tũmaga pexĩnũẽxũ ya guxãma ya yĩxema perũ ãẽxgacũgũ ixĩgũxe. Rũ ngẽmaãcũ name nixĩ i meã naga pexĩnũẽ ya ãẽxgacũ ya tacũ ya Dumawa ngẽxmacũ, erũ nũma nixĩ i guxũ i togũ i ãẽxgacũgũétũwa nangẽxmaxũ.

14 Rũ ngẽxgumarũũ ta name nixĩ i naga pexĩnũẽ i ngẽma togũ i ãẽxgacũgũ i petanũwa namugũxũ ya yima ãẽxgacũ ya tacũ na napoxcueãxũcèx i ngẽma chixexũ ùgũxũ rũ namaã nataãgũxũcèx i ngẽma mexũ ùgũxũ.

15 Erũ Tupana nanaxwèxe na mexũ pexũgũxũ na ngẽmaãcũ ipeyanangeèxgũxẽẽxũcèx i ngẽma duũxũgũ i tama Tupanaãrũ orexũ cuáxchaũgũxũ rũ chixri ngẽma orechiga idexagũxũ.

16 Rũ ñuxma na Cristu pexũ ínguxũxẽẽxũ, rũ name nixĩ i duũxũgũ i aixcũma ínguxũxũrũũãcũ meã pemaxẽ. Natürũ ñuxma na ípenguxũxũ rũ tama name na ngẽmamaã pegũ ípepoxũxũ na tacũ rũ chixexũ pexũgũxũcèx. Erũ ñuxma na Tupanaãrũ duũxũgũ pixĩgũxũ, rũ name nixĩ i norũ ngúchaũxĩcatama pexũgũ.

17 Rũ name nixĩ i meã penayauxgũ i guxũma i duũxũgũ. ¡Rũ nũxũ pengechaũ i taeneẽgũ i yaxõgũxũ! ¡Rũ nũxũ pemuũẽ ya Tupana! ¡Rũ naga pexĩnũẽ ya ãẽxgacũ ya tacũ ya Dumacũãx!

Tanaxwèxe i Cristurũũ yaxna namaã taxĩnũẽ i ngẽxguma ngũxũ ingegũgu

18 Pa Duũxũgũ i Coriãxgũxũx, ¡rũ nũxũ pengechaũgũ rũ naga pexĩnũẽ i perũ corigũ! Rũ tama name i ngẽma perũ corigũ i pemaã mecũmaxũxũxĩcatama pengechaũgũ, natürũ name

nixĩ i nüxũ pengechaũgũ ta i ngẽma perũ corigũ i chixecũmaxũ.

19 Erũ Tupana rü pemaã nataãẽ ega nüxũ na pengechaũgũxũcèx yaxna namaã pexĩnüẽgu i ngẽxguma texé natũcèxmamare chixexũ pemaã üxgu rü ngúxũ pexũ tingexẽẽgu.

20 Natürũ ¿tacüwa pexũ namexũ ega yaxna namaã pexĩnüẽgu i ngẽxguma wüxi i perũ chixexũcèx pepoxcuegu? Natürũ ngẽxguma tacü rü mexũ i pexüxügagu ngúxũ pingegũgu rü yaxna namaã pexĩnüẽgu, rü ngẽma waxi nixĩ i Tupanapẽxewa mexũ.

21 Rũ ngẽma na mexũ pexüxügagu ngúxũ pingegũxũcèx nixĩ i Tupana pexũ dexũ. Yerũ ga Cristu rü ta pexcèx ngúxũ ninge. Rũ yemaãcü pexũ nüxũ nadauxẽẽ na ñuxãcü nüma nanaxwèxexũ na naxrũũ yaxna namaã pexĩnüẽxũ i ngẽma ngúxũ.

22 Nüma ga Cristu rü taguma pecadu naxü, rü taguma texéxũ nawomüxẽẽ.

23 Rũ yexguma duũxũgũ chixexũ namaã ixugüegu, rü nüma rü taxuũma ga chixexũmaã nanangãxũ. Rũ yexguma ngúxũ nüxũ yangexẽẽgũgu, rü nüma rü tama tacü rü chixexũmaã nanaxãũxũne. Natürũ Tupanamaã nüxũ nixu na nüma namaã namexẽẽãxũcèx ga yema duũxũgũ ga chixri namaã chopetüxũ. Yerũ nüxũ nacuèx rü Tupana rü aixcüma meã nanangugũ i guxũma i duũxũgüarũ maxũ.

24 Rũ nümatama ga Cristu rü nügüxũnegu nayange ga tórü pecadugũ ga yexguma curuchagu nayuxgu. Rũ yemaãcü nanaxü na nüxũ rüxoexũcèx i tórü chixexũ na naxcèxicatama imaxèxũcèx. Nüma rü pexcèx nanapix na

yemaãcü pexũ nameẽxẽẽxũcèx.

²⁵ Rũ pema ga ũpa rũ ñoma carnerugũ i nu ne naxĩmarexũrũũ pixĩgũ. Natũrũ i ñuxma rũ marũ Cristucèx pewoegu. Rũ nũma nixĩ i perũ dauruũ yĩixũ, rũ nũma nixĩ i pexna nadauxũ.

3

Ñuxãcü Tupana nanaxwèxe na namaxẽxũ i ngẽma ixãmaxũ rũ ixãtexũ

¹⁻² Rũ pemax, Pa Ngexũgũx, rũ name nixĩ i pe-tega pexĩnũe na ngẽma pete i tama yaxõxũ nũxũ dauxũcèx i perũ maxũ i mexũ i Tupanapẽxewa rũ duũxũgũpẽxewa rũ ngẽmacèx na yaxõõxũcèx woo taxuũma i Tupanaãrũ orexũ namaã pixugu.

³ Rũ ngẽma na aixcũma pimexũcèx, rũ tama name i nagu perũxĩnũe na ñuxãcü pegũ pemexẽẽyaexũchixũ, rũ ãxna uirunaxcèx i ngèxãẽruũmaã pengèxãẽgũxũ, rũ ãxna tatanũxũchixũ i naxchirugu na picuxgũxũ.

⁴ Natũrũ name nixĩ i perũ maxũwa pegũ pimexẽẽgũ rũ guxũma i duũxũgũmaã pimecũmagũ rũ taguma texémaã penuãẽgũ, erũ ngẽma nixĩ i perũ mexũ i taguma iyarũxoxũ i aixcũma mexũ i Tupanapẽxewa.

⁵ Rũ yemaãcü norũ maxũ i mexũmaã nixĩ ga nũgũ yangèxãẽgũxũ ga yema nuxcũmaũgũxũ ga ngexũgũ ga Tupanapẽxewa ixũunexũ. Rũ nũmagũ rũ Tupanaãxũ nayaxõgũ rũ natega naxĩnũe.

⁶ Rũ yemaãcü ta iyixĩ ga Chara ga ngĩte ga Abráũga na naxĩnũxũ, rũ ngĩrũ corimaã naxu-axũ. Rũ pemagũ rũ tá ta ngĩrũũ pixĩgũ ega mexũ

peşügügu. Rü ñuxũchi taxucèxtáma tüxcüũ petecèx pemuê.

⁷ Rü ngêxgumarüũ ta i pemax, Pa Yatügüx, rü name nixĩ i meã pemèxũ pengechaũgü rü aixcüma yaxna ngĩmaã pexĩnüê, erü ngĩma rü irüturamaê. Rü name nixĩ i ngĩmaã petaãêgü erü Tupana rü pexna naxãxũrüũ ngĩxna nanaxã i ngẽma maxũ i taguma gúxũ. Rü name nixĩ i ngẽmaãcü meã ngĩmaã pemaxê na Tupana nüxũ ñnuxücèx i perü yumüxêgü.

Yíxema mexũ ügüxe ya ngúxũ ingegüxechiga

⁸ Rü ngẽmaãcü chanaxwèxe i guxãma i pema rü pegüxũ pengechaũtümüũgü rü wüxigu perüxĩnüê, rü aixcüma nüxũ pengechaũgü i guxũma i taeneêgü i yaxõgüxũ. Rü chanaxwèxe i aixcüma pemecümagü rü guxãmaã pegü pewüxigüxêê.

⁹ Rü ngêxguma texé chixexũ pemaã üxgu, rü tama name i pema rü ta chixexũ tümamaã pexü. Rü ngêxguma texé pemaã guxchigagu, rü tama name i pema rü ta tümamaã peguxchiga. Natürü narümemaê nixĩ i mexũ i oremaã tüxũ pengãxũga rü tüxũ perüngüxêê, erü Tupana pexũ nadei na pexũ nangüxêxücèx.

¹⁰ Erü Tupanaãrü ore i ümatüxũwa rü ñanagürü: “Ngêxguma texé taãêãcüma maxchaũgu, rü name nixĩ i nüxna tadau ya tümããrü conü na tama chixexũ i oremaã yadeaxücèx. Rü ngêxgumarüũ ta name nixĩ i nüxna tadau i tümããx na tama doraxũ yaxuxücèx.

¹¹ Rü name nixĩ i nüxna tayaxũ i guxũma i chixexũgü, rü mexũ taxü. Rü ngêxgumarüũ ta

name nixĩ i guxũguma naxcèx tadau na togũmaã tataãẽxũ.

¹² Erũ tórũ Cori rũ tũxna nadau ya yĩxema aixcũma ímexẽ, rũ nüxũ naxĩnü i tũmaãrũ yumũxẽ. Natürũ tũmamaã nanu ya yĩxema chixexũ ügũxe”, ñanagürũ i ngẽma Tupanaãrũ ore.

¹³ ¿Rũ texé tá chixexũ pemaã üxũ ega pema rũ aixcũma guxũguma mexũ pexũgũgu?

¹⁴ Natürũ ngẽxguma chi ngẽma mexũ na pexũgũxũcèx ngũxũ pingegũgu, rũ name nixĩ i petaãẽgũ. ¡Rũ taxucèxma texéxũ pemuũẽ, rũ taxucèxma tacücèx pexoegaãẽgũ!

¹⁵ Rũ name nixĩ i perũ Corixũ peyaxĩxẽẽ ya Cristu rũ aixcũma naga pexĩnüẽ, rũ guxũguma ípememare na meã penangãxũxũcèx i guxũma i duũxũgũ i pexna çaxũ na tũxcũũ Cristuaxũ peyaxõgũxũ.

¹⁶ Natürũ name nixĩ i nüxũ pengechaũãcũma penangãxũ rũ tama pegũgu perũxĩnüẽãcũma na norũ yexera pixĩgũxũ. Rũ name nixĩ i meã pemaxẽ na taxucèxma pexoegaãẽxũcèx. Rũ ngẽxguma ngẽmaãcü pemaxẽgu rũ tá naxãneẽ i ngẽma duũxũgũ i chixri pechiga idexagũxũ na ñuxãcü Cristucèx pemaxẽxũ.

¹⁷ Yixema rũ ngũxũ tingegũ ega chixexũ ixũgũgu. Natürũ narũmemaẽ nixĩ na mexũ ixũgũxũcèx ngũxũ na ingegũxũ, ega ngẽmaãcü Tupana naxwèxegu.

¹⁸ Yerũ nümatama ga Cristu rũ ngũxũ ninge, rũ wũxicanatama guxããrũ pecaducèx nayu. Rũ woo na mecü yĩxũ rũ taxcèx nayu i yixema i chixexũ i duũxũgũ ixĩgũxũ. Rũ yemaãcü nanaxü na Tupanaxũtawa tũxũ nagagũxũcèx. Rũ woo nayu ga naxũne, natürũ ga naãẽ rũ tama nayu.

19 Rū yexguma naxũne yuxgu rü naãẽ rü natanüwa naxũ ga yema naãẽgü ga Tupana poxcuexũ, rü orexũ namaã nayarũxu.

20 Rū yema naãẽgü ga yexma poxcuexũ, rü yema nixĩ ga naãẽgü ga yema duũxũgü ga Noe maxũgu tama ixĩnüẽchaũxũ woo Tupana yaxna namaã naxĩnü ga yexguma Noe naxüyane ga guma wapuru. Rū 8 ga duũxũgüxicatama nixĩ ga guma wapurugu ichoũxũ, rü yema nixĩ ga guma mucü ga taxüchicüarü dexáétüwa maxẽxũ.

21 Rū yema dexá rü wüxi ga cuèxruũ nixĩ. Erü ngẽxguma dexáwa íbaiegu, rü duũxũgüxũ nüxũ tacuèxẽẽ na Ngechuchu ya Cristu wena maxũxũgagu yĩxũ i tüxũ nangẽxmaxũ i maxũ i taguma gúxũ. Rū tama taxüneärü düxétüwa na imexücèx nixĩ i íbaiecxũ, natürü ítabaie yerü marü Tupanana naxcèx taca na tüxũ iyanaxoxẽẽãxüçèx ga tórü pecadugü na aixcüma napẽxewa imexücèx rü aixcüma mexũgu rüxĩnüẽxüçèx.

22 Rū nüma ga Ngechuchu ya Cristu, rü daxũguxũ i naãnewa naxũ, rü ñuxma rü Tupanaärü tügünecüwawa nangẽxma. Rū ñuxma rü namẽxwa nangẽxmagü i guxũma i Tupanaärü orearü ngeruũgü i daxüçüãx rü guxũma i ãẽxgacügü i daxüçüãx.

4

Tanaxwèxe i ngẽma cuèx i Tupana tüxna ãxũmaã nüxũ tarüngüxẽẽ i taeneẽgü

1-2 Rū ngẽmacèx name nixĩ na ípememarexũ na ngúxũ pingegüxũ yexgumarüü ga Cristu na ngúxũ yangexũ. Erü yíxema ngúxũ ingexe rü marü nüxũ

tarüxo i tümaãrũ pecadu na guxũguma meã Tupana naxwèxexũãcüma tamaxũxũcèx, rü tama i tümaxũne naxwèxexũãcüma na tamaxũxũcèx.

³ Üpa ga pemax, rü mucüma ga taunecü penaxüecha i ngẽma chixexũ i ñuxma i ngẽma duũxũgü i tama Tupanaxũ cuèxgũxũ ügũxũ. Rü yexguma ga pema rü pecadu pexügũãcüma pemaxẽ, rü penaxü ga pexeneãrũ ngúchaũ, rü pengãxẽ, rü peta ga nawa pexãũgatanũxũ pexügü, rü tacü i nguchièxgũxũ poraãcü pixaxcugü, rü tupananetachicünèxãgũxũ picuèxüügü i woo Tupana na pexna nachuxuxũ i ngẽma.

⁴ Rü yema duũxũgü ga namaã pexãmücügũxũ ga yexguma chixri pemaxẽgu, rü ñuxma rü poraãcü nagu narũxĩnũẽ na tacücèx tama natanügu pexãgũxũ rü tama nawe perũxĩxũ i ngẽxguma norü chixexũ naxügügu. Rü ngẽmacèx nixĩ i ñuxma i chixri pechiga yadexagũxũ.

⁵ Natürü nümagü rü tá ta Cristupèxewa nangugü na namaã nüxũ yaxugũxũcèx na ñuxãcü namaxèxũ. Rü nüma ya Cristu rü ínamemare na nüxna yacachigũxũcèx i guxũma i duũxũgü i maxèxũ rü yuexũ.

⁶ Rü ngẽmacèx ya Tupana rü naxũpa na nayuexũ i duũxũgü rü marü nüxna nanaxuaxũ i maxũ i taguma gũxũ. Erü nanaxwèxe na naxrũũ guxũguma mexũwa namaxẽẽchaxũ ega woo ñoma i naãnewa nayuegu i naxũnegü.

⁷ Rü marü ningaica na nagúxũ i ñoma i naãne rü guxũma i tacü i nawa ngẽxmaxũ. Rü ngẽmacèx name nixĩ na ípexuãèxũ rü meã peã ta ipexügũxũ rü guxũguma peyumüxègũxũ.

⁸ Rü guxũãrũ yexera i ngẽma pexũ

chanaxwèxexũ nixĩ na aixcũma pegũ pengechaũgũxũ i wũxichigũ. Erũ ngẽxguma aixcũma yigũ ingechaũgũgu rũ ngẽmaãcũ inayarũxo i muxũma i pecadugũ.

⁹ ¡Rũ meã pegũ peyauxgũ i wũxichigũ i pechiũwa! Rũ tama name i tũmamaã penuãẽãcũma tũxũ peyaxu.

¹⁰ Rũ wũxichigũ i pemax, rũ Tupana pexna nanaxã i perũ cuèx. Rũ ngẽma perũ cuèxmaã rũ name nixĩ i wũxichigũ pegũ perũngũxẽẽgũ, na aixcũma Tupanaãrũ ngũxẽẽruũ i mexũ na pixĩgũxũcèx rũ meã namaã pepuracũexũcèx i guxũma i ngẽma cuèx i Tupana pexna ãxũ.

¹¹ Rũ ngẽxguma texé nũxũ ixuxgu i ore, rũ name nixĩ i aixcũma Tupanaãrũ orexũ tixu. Rũ ngẽxguma texé togũxũ rũngũxẽẽgu, rũ name nixĩ i Tupana tũxna ãxũ i poramaã tanaxũ. Rũ guxũma i ngẽma pexũxũ rũ name nixĩ i meãma penaxũ na ngẽmaãcũ Ngechuchu ya Cristugagu Tupanaxũ picuèxũũgũxũcèx. Erũ nũma ya Tupana rũ guxũguma namexẽchi rũ naporaxũchi. Rũ ngẽmaãcũ yĩ.

Ngẽxguma Cristuaxũ yaxõxgu rũ ngũxũ tinge

¹² Pa Chaueneẽgũ ya Pexũ Changechaũgũxex, ñuxma na taxũ i guxchaxũgũ i perũ nguxẽẽruũ pexcèx ínguxũ, ¡rũ tãxũ i pebaixãchiãẽgũxũ, ñoma tacũ i taguma nũxũ pedauxũ ngupetũxũrũũ!

¹³ Natũrũ narũmemaẽ nixĩ na petaãẽgũamaxũ, yerũ yema Cristu ngũxũ na ingexũrũũ nixĩ i ngũxũ na pingegũxũ i ñuxmax na petaãẽgũxũcèx i ngẽxguma wena núma naxũxgu i nũmax.

14 Rū ngēxguma Cristuaxū na peyaxōgūxūgagu texé pemaã guxchigagu, rü wüxi i perü taãe nixĩ i ngēma. Erü ngēmaãcü nüxū pecuèx na Tupanaãe i Üünexū rü pewa na nangēxmaxū.

15 Rū ngēxguma chi ngúxū pingegügu, rü name nixĩ na wüxi i mexū na pexügūxūgagu na yĩxū rü tama wüxi i chixexūgagu na yĩxū, ngēxgumarüü i máeta rü ēxna ngíteèx rü ēxna togüarü guxchaxūwa na pegü pengēxmagüxēèxū.

16 Natürü ngēxguma texé Cristuaxū tayaxōxūgagu ngúxū tingexgu, rü taxucèxma tüxcüü ngēmacèx taxāne. Rū name i ngēmacèx Tupanaxū ticuèxū.

17 Rū ñuxma rü marü nawa nangu na Tupana ngúxū tüxū ingexēèxū na ngēmaãcü tüxū iyanawēxāchixēèxücèx i yixema na naxācügü ixīgüxū. Rū ngēxguma ngēmaãcü tamaã inaxügüāgu, rü ¿ñuxācü tá nüxū naxüpetü i ngēma duūxügü i tama Tupanaärü ore i mexūga ñnüèchaūxū?

18 Erü Tupanaärü ore i ümatüxūwa rü ñanagürü: “Ngēma duūxügü i mexū ügüxū rü guxchaãcüma nanayauxgü i maxū i taguma gúxū. Rū ñuxma na ngēmaãcü yĩxū, ¿rü ñuxācü tá nüxū nangupetüxū i ngēma duūxügü i chixexū ügüxū rü pecaduāxgüxū?”

ñanagürü.

19 Rū ngēmacèx ya yixema Tupana naxwèxexūãcüma ngúxū ingegüxe, rü name nixĩ na mexū taxügüechaxū rü Tupana ya tüxū ücüméxēgu na tanaxūxū i tümaãe na nüxna tüxū nadauxücèx. Erü nüma ya Tupana rü mecü nixĩ rü taguma texéxū nawomüxēè.

5

Ucuxëgü naxcèx i ngëma yaxôgüxü

¹ Rû ñuxmax, Pa Yaxôgüxüârü ãëxgacügüx, rü pexna chanaxâxchaü i wüxi i ucuxë i mexü, erü choma rü ta pexrüü yaxôgüxüârü ãëxgacü chixĩ. Rû chomaxüchima nixĩ ga nüxü chadauxü ga ñuxâcü ngüxü na yangexü ga Cristu. Rû choma rü tá ta pexrüü choxü nangëxma i chauchica i mexü i ngëxguma wena núma naxüxgu.

² Rû chanaxwëxe i nüxna pedau rü nüxü perüngüxëë i guxüma i Tupanaârü duüxügü i pemëxwa ngëxmagüxü. Rû name i mexü i perü ngüchaümaã Tupana naxwëxexüâcüma penaxü i ngëma puracü, rü tama texé pexü muxguxica penaxü rü ëxna dïërucèx penaxü.

³ Rû tama name i namaã penuëâcüma rü penangaâcüma penamu i ngëma duüxügü. Natürü chanaxwëxe i mexü i perü maxü nüxü pewëx na ñuxâcü Tupana naxwëxexü na namaxëxü.

⁴ Rû ngëxguma wena núma naxüxgu ya tórü Daurüxüchi ya Cristu, rü pema rü tá penayauxgü i wüxi i perü ãmare i ngëxcuerü i mexëchixü i taguma ngauxü.

⁵ Rû ngëxgumarüü ta i pemax, Pa Ngextüxücügüx, rü name nixĩ i naga pexĩnüë i ngëma perü ãëxgacügü i Tupanaârü puracüwa puracüexü. Rû guxâma i pema i yaxôgüxü, rü name nixĩ i wüxichigü pegü perüngüxëë rü taguma pegügu perüxĩnüë na pemücügüarü yexera pixigüxü. Erü Tupanaârü ore i ümatüxüwa rü ñanagürü:

“Tupana rü tama norü me nixĩ i ngẽma duũxũgũ
i nũgũ icuèxũxũgũxũ. Natürü nüxũ
narüngũxẽẽ rü namaã namecũma i ngẽma
duũxũgũ i tama nũgũ icuèxũxũgũxũ”,

ñanagürü i ngẽma ore.

⁶ Rü ngẽmacèx tama name i pegü picuèxũxũ. Rü
narümemaie i Tupanamẽxẽ ya poranetũxũwa pegü
pengẽxmagũxẽẽ na nüma pexũ yacuèxũxũgũxũcèx
i ngẽxguma nawa nanguxgu na ngẽmaãcü pemaã
naxũãxũ.

⁷ Rü name nixĩ i Tupanamẽxẽgu penaxü i guxũma i
perü oegaãẽgü, erü nüma ya Tupana rü guxũguma
pegu narüxĩnũ rü aixcũma pexna nadau.

⁸ Rü name nixĩ i guxũguma pegüna pedaugü
rü ipexuãẽgü, erü perü uwanü i Chataná rü
doma wüxi ya ai ya idüraxüchicürüũ nanañaãne rü
tũmacèx nadau na texéxũ tá nachixexẽẽxũ.

⁹ ¡Rü peporaeamèx rü peyaxõgüamèx i ngẽxguma
tacü rü chixexũ pemaã naxũxchaũgu! Erü nüxũ
pecuèx rü guxũma i taeneẽgü i guxũwama
ngẽxmagũxũ rü pexrũũ ngẽmatama ngúxũ ningegü.

¹⁰ Natürü ngẽxguma paxaxãchi ñoma i naãnewa
ngúxũ pingegüguwena, rü Tupana rü tá pexũ
nimexẽẽ na aixcũma napẽxewa pimexũcèx, rü tá
pexũ narüngũxẽẽ na taguma nüxũ perüxoexũcèx,
rü tá pexũ naporaexẽẽ na aixcũma perü maxũwa
peporaexũcèx. Rü daatama Tupana nixĩ ya tũxna
naxãcü i guxũma i mexũ i tũxũ ngẽxmaxũ, rü tũxũ
deicü na naxütawa tũxũ nangẽxmaxũcèx i tachica i
mexũ i taguma gúxũ, erü Ngechuchu ya Cristuarü
duũxũgũ tixĩgü.

¹¹ Rü name nixĩ i guxũguma nüxũ ticuèxũgü ya
Tupana, erü nüma nixĩ i guxũãrũ ãẽxgacü yĩxũ i

guxũguma. Rũ ngẽmaãcü yĩ.

Pedru rũ yema yaxõgũxũxũ narũmoxẽ

¹² Taeneẽ ya Chiribánu ya meã yaxõcümaã petanüwa chanamu i ñaã nuxmarexũ i popera na pexũ chixucũxẽgũxũcèx rũ pemaã nüxũ chixuxũcèx na ngẽma pexũ nangechaũxũgagu yĩxũ ya Tupana i aixcüma pexũ nangũxẽẽxũ. Rũ ñuxma na ngẽmaãcü pexũ nangechaũxũ, rũ name nixĩ i guxũguma naxcèx pemaxẽ.

¹³ Rũ pexũ narũmoxẽgũ i guxũma i taeneẽgũ i yaxõgũxũ i pexrũ Tupana dexũ i núma Dumawa ngẽxmagũxũ. Rũ ngẽxgumarũ ta pexũ narũmoxẽ i chorũ ngũxẽẽrũ i Marcu ya chaunerũ ixĩcü.

¹⁴ Rũ chanaxwèxe i wũxichigũ i pema rũ pegũ pengechaũgũãcüma pegũ perũmoxẽgũ. Rũ ngẽxgumarũ ta chanaxwèxe na aixcüma petaãgũxũ i guxãma i pema na Ngechuchu ya Cristuarũ duũxũgũ pixĩgũxũ. Rũ ngẽmaãcü yĩ.

Rũ nuãma pexna,
Pedru

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6